

IKOT MOSES KE IKOT EKE ASAKDE IKAÑ

Exodus 3:1-22

QYQHỌ UKPEP-ÑKPỌ 48

Eke Mkparawa

IKỌ IBUOT: “Mmọ eke ekotde ewak, edi mmọ eke emekde iwakke” (Matthew 22:14).

Moses Ye Erọñ

Ke ini Moses ama ekefehe ọkpọñ iso Pharaoh, enye ama okoduñ ke Midian, do ke enye okodu ke isua aba. Nnyin imeti ite ekedi mme anyam-urua mbon Midian ekeda Joseph eka ke Egypt. Ubon nditọ Midian edu ke otu mbon Arab mfin. Moses ama ọdọ eyen Jethro ańwan, oku Midian, ekeme ndidi mmọ ema enam akpanikọ ke edu ukpono mmọ, koro Jethro ama ọsuhọde aka ke akai-ikot okosobo ye Moses ke ini nditọ Israel ema ekewọrọ ekpọñ Egypt, do ke enye okonyuñ otoro Abasi ke akwa ufak Esie. Enye ñko ama awa uwa ọnọ Abasi, emi Moses ye Aaron eketienede ebuana.

Moses ekekere ete ke Abasi okoyom ndida imọ ñwam nditọ Israel, oruk esie, edi ke ini enye okoyomde ndisin emem ke ufot owo iba, mmọ ikonyimeke ndikpañ utọñ. Enye okonim ke akpanikọ ete ke mmọ idinyeneke mbubehe ye imọ, ntre enye ikekereke ndifiak ñka Egypt.

Edu-uwem Moses mi ama enyene akwa ukpuhọre ye nte ekedide ke Egypt. Enye okoduñ do ke okure edidem, enyene nditọ ufok emi ekenamde ñkpọ enọ enye, onyuñ enyene ebuana ke kpukpru ñkpọ inemesit ke okure oro. Ke ini emi enye ọkọbọk ufene ọnọ ete-ńwan esie ke akpa-utatan, anam usuhọre ubok utom. Edi Abasi ama enyene ntak ọnọ kpukpru ñkpọ emi, okonyuñ ọnọ Moses ukpep-ñkpọ abaña akwa utom emi enye edinamde.

Obot Abasi

Usen kiet, Moses ama ada mme ufene asaña ekpere obot Horeb, emi ñko ekerede obot Sinai. Nwede Abasi okot enye obot Abasi, nnyin iyekpep ñkpọ ibaña mme ini efen emi Enye akayararede Idemesie owut mme owo ke obot emi. Ekedi mi ke Abasi ọkọnọ nditọ Israel Ibet, onyuñ ewet enye ke itiat-ńwed. Ema ewet ete ke obot emi ke Jehovah okosioño nneme ye Moses “iso ye iso, nte emi owo osioñode nneme ye ufan esie” (Exodus 33:11). Abasi nditiñ ikọ nnọ Moses ke ikot emi asakde ikañ edi akpa ke otu ekese utibe ediyararede idem emi Abasi okowutde Moses ke eyo uwem esie.

Ikot

Ndusuk, ufiop ama okpon eti eti ke akpa-utatan, ndien ikañ ikonyuñ idighe esen ñkpọ. Moses ndikut nte ikot asakde ikañ ikanamke enye edikhe, edi ke ini nsat eto oro esuk esakde ikañ, idem ama akpa Moses ndien enye asaña ekpere ete ifiok ntak emi ikañ osuk asakde edi itaha eto. Abasi ke okosuk ekpeme ndikut se Moses edinamde; ndien ke ini Enye okutde nte Moses asañade ekpere ikot, Enye okot enye.

Ọbọñ Abasi amayak uńwana Eti-mbuk ayama ọwọrọ man kpukpru owo ekpekut enye, edi ibat-ibat owo enyene inem ndiwońhọre nda nnyuñ nyom ndifiok ntak uńwana emi. Okposuk nte uńwana ukpep-ñkpọ Christ esibemde ntat enyin iso, ata ediwak owo ke enyuñ edara ke mme edidiọñ emi enye adade edi ke obio emi, idighe ediwak owo enyime ndinọ Abasi ubọñ ke ndiyere ikot nnyuñ ndu uwem nnọ Enye.

Ke ini Abasi ama ọkọfiok ete ke Moses omokut utibe-ñkpọ oro, nte ikot asakde ikañ, Enye okot, “Moses, Moses.” Moses ama ọsọsọp eyere ikot Abasi: “Se mi.” Enem didie Jesus esit ke ini owo eyerede ikot Esie ete “Se mi mi ndinam utom Fo!” Oruk iren, iban, mkparawa ye mme ñka-iferi ntem ke Abasi ekeme ndida nnam ñkpọ.

Abasi ama ọdọhọ Moses ete osioño ikpa-ukot ke ukot esie efep koro isọñ oro enye adade edide edisana. Ke ndo-ndo oro ebiet oro ama akabare edi ufok Abasi, koro do ke Abasi okosobo ye owo, ndien Enye okoyom Moses eteñe ebiet oro. Nnyin ikemeke nditiñ mbe adaña, ntak emi akpanade nte ekpono ufok-Abasi. Ebiet ekededi eke mme owo esobode idem ndituak ibuat nnọ Ọbọñ ke spirit edi ufok-Abasi. Ke ini Jacob okokopde nte Abasi etiñde ikọ ọnọ enye ke Bethel, ebiet oro enye akadabade ndap okut nte mme angel edọdọk enyuñ esọsuhọde ke ufot heaven ye isọñ, enye ama anam itie-uwa do ke ańwa oro, onyuñ okot enye ufok-Abasi. Nnyin inyene nditi nte ke Abasi omokut kpukpru se nnyin inamde; ndien ke ini nnyin idide ke iso Esie, nnyin inyene ndisaña suñ-suñ, ke nsuhọre-idem, isine edisine-ñkpọ eke enemde Enye esit, ye spirit akam ke esit nnyin. Nnyin ikpenyene ndikpọnọre kpukpru ekikere ñkpọ uwem emi nnim, inyuñ ituak ibuat inọ Abasi ke uyai edisana-ido.

Eńwọñọ Erifak

Abasi ama ɔdɔhɔ Moses ete ke Imɔ idi Abasi Abraham, Isaac ye Jacob, emi ekedide mme ete ete Moses. Enye ikereke mme eñwɔnɔ oro enye akanamde, ete ke eyeto ke mkpasip mmɔ kpukpru idut ke ererimbot ebɔ edidiɔn. Enye ama ɔñwɔnɔ ñko ete ke mmɔ eyeda isoñ Canaan enyene. Kaña, eketie nte ndɔnesit ikoduhe koro Nditɔ Israel ekesuk edu ke idak ufin ke Egypt, enam ñkpɔ enɔ mme anana-esit mbɔm ete-ufɔk mmɔ.

Edi Abasi ama anam Moses ɔfiɔk ete ke Imɔ imokut kpukpru ndutuhɔ mmɔ, inyuñ ikop kpukpru ntuaña mmɔ, ndien ke ini emekpere eke Imɔ idifakde mmɔ inyuñ inɔde mmɔ udeme emi ekeñwɔnɔde. Ekeme ndidi Moses ama enem esit eti-eti ndifiɔk nte ke ikɔt esie eyebɔhɔ, idinyuñ ibɔhɔ aba ufen.

Suhɔre Idem Ke Iso Abasi

Edi ke ini Abasi ɔdɔhɔde Moses ete edi ada-usuñ emi edisionode nditɔ Hebrew ifep ke ufin, enye ofiori ete “Ami ndi anie, eke ndikade ke ɔtɔ Pharaoh, nnyuñ nsio nditɔ Israel ke Egypt mfep?” Enye ikedighe aba owo emi mitiehe ibet uyo Abasi nte enye ekedide ke isua aba emi ekebede, ke ini enye okoyomde ndinyaña ikɔt esie ke odudu idemesie. Idahaemi enye ama ɔsuhɔde idem onyuñ ebere ke Abasi, ndien Abasi ɔdɔhɔ enye ete, “Nditreke ndidu ye afo.” Ndien edieke Abasi odude ye nnyin, anie edikeme ndibiɔnɔ nnyin?

Mbon nsuhɔre-idem ke Abasi ekeme ndida nnam utom Esie. Ke ini Abasi okokotde Saul ete edi edidem, Saul ɔkɔbɔrɔ “Nte ami ndighe eyen Benjamin, nto ke ata ekpri esien Israel? Nte oruk mi inyuñ ikprike ikan kpukpru oruk esien Benjamin? Nsinam ndien afo ɔdɔhɔde mi oruk ikɔ emi?” (1 Samuel 9:21). Edi ke ini Saul ama okokohode idem minyuñ ikopke uyo Abasi, Samuel eti enye ete ke ini enye ekedide ekpri ke enyin esie, Abasi ama anam enye edi edidem, edi ke ini enye emenerede idemesie, ebɔ enye ubɔñ oro.

Ke ini Abasi okokotde Jeremiah ete edi etiñ ntiñ-nnim ikɔ, enye ɔkɔbɔrɔ ete, “Aha, ɔbɔñ Jehovah! Sese, mfiɔkke nditiñ ikɔ: koro ami ndide eyen-ɔwɔñ.” Ndien Jehovah ɔdɔhɔ enye ete “Kufehe iso mmɔ; koro ami ndude ye afo ndinyaña fi; Jehovah ɔdɔhɔ” (Jeremiah 1:6, 8). Ndien Jeremiah akabade edi ata utibe anditiñ ntiñ-nnim ikɔ emi ewetde mme ikɔ esie esin ke Edisana Ñwed Abasi.

Moses ama okop ndik ndifiak ntiene nditɔ Israel koro enye ekekerede ete ke mmɔ idikopke uyo imɔ. Edi Abasi ama ɔnɔ enye odudu. Abasi ama ɔdɔhɔ enye etiñ ɔnɔ otu owo ete ke Abasi Abraham, Isaac ye Jacob ɔdɔñ imɔ. Mme Jew, tutu osim ini Christ, ema ekpono ete mmɔ Abraham akpan-akpan; ke ntre, edieke Abasi Abraham eketiñde ikɔ ɔnɔ mmɔ, mmɔ ekpenyene ndikpañ utɔñ.

Abasi ama eteme Moses kpukpru se enye ekenyenede nditiñ nnɔ otu owo, kpa ntre ke Enye onyuñ anam ye kpukpru nti mme ɔkwɔrɔ ikɔ Esie. Spirit Abasi ekpep owo kiet-kiet ñkpɔ ukem-ukem, ntem nnyin imɔbɔhɔ ke itienede ata eti owo Abasi.

Pharaoh Inyimeke

Abasi ama eteme Moses ete yak enye obon kpukpru mme ada-usuñ ke ikɔ Abasi ke otu nditɔ Hebrew ɔtɔ kiet, onyuñ aka ye mmɔ ke ɔtɔ Pharaoh ekebeñe ete ayak man mmɔ eka ekenam uwa enɔ Abasi ke akai-ikɔt. Emi ikedighe Pharaoh andikoyom ndinɔ Moses ufen koro enye okowotde eyen Egypt.

Nditɔ Egypt ikatuakke ibuat inɔ ata Abasi. Mmɔ ema enyene ediwak mme abasi emi ekekerede ete ke ndusuk mmɔ eduñ ke idem mme unam. Nte uwut-ñkpɔ, ke ini mme Jew edade ayara abak enañ enam uwa, nditɔ Egypt ebat oro ke mbubiam koro mmɔ enimde ete, ndusuk, kiet ke otu mme abasi mmɔ ɔkɔsuhɔre edi ke isoñ ediduñ ke idem enañ. Ke ntre nditɔ Israel ema enyene eti ntak ndiyom ndika ke akai-ikɔt ke ebiet eke nditɔ Egypt midikwe nte mmɔ enamde uwa mmɔ enɔ Abasi. Ke ini iso, ke ini idikpepde ñkpɔ ibaña mme ufen emi okosimde nditɔ Egypt, iyetim ifiɔk ibaña mme nsio-nsio abasi emi mmɔ ekekonode.

Abasi ama ɔfiɔk ete ke Pharaoh idinyimeke ndinam se Moses ye mbiowo edibeñede, edi Abasi ama etiñ ɔnɔ Moses ete ke ini ediwak ufen edisimde Egypt, eyesioño nditɔ Hebrew efep, ndien mmɔ eyetañ ediwak inyene nditɔ Egypt emi edinɔde mmɔ ke mfɔn.

MME MBUME

- 1 Nso ikedi ubɔk utom Moses ke ini emi?
- 2 Nso enyin ita ke ekekot obot emi Moses akakade?
- 3 Nso ke Moses ɔkɔbɔrɔ ke ini ɔbɔñ okotde enye ke ikɔt emi akasakde ikañ?
- 4 Nso ikedi akwa utom emi ɔbɔñ okokotde Moses ɔdɔñ?
- 5 Nte Abasi ama ɔñwɔnɔ ndidu ye enye?